

黃氏逸書考

張璠漢記序

章逢之孝廉重輯華叔駿書及此記各一卷
不獨此也凡隋書經籍志所列目積生平全
力以返其魂竟十得八九哀然大觀惟半燬
於火半賴葉雲素先生代藏東卿駕部爲京
朝官數十年深以琉璃廠手工劣價昂開
雕不易倘崑臣方伯毅然發三世之藏公諸
同好則余之逸書考二百八十餘種盡成重
儻雖覆瓿亦焉用之每讀淵如先生集并其

書曰竊歎孝廉之精博何惑于異教使盛德
大業半塗而廢爲可惜已張氏記最晚出觀
袁彥伯自序云經營八年始見張璠所撰書
其言漢末之事差詳彼余氏厯叙羣史亦獨
遺此吳正儀並以爲無考然則姚侍御始事
蒐討大輅椎輪厥功宜偉特惜其知引裴松
之注而不注其孰出三國志注孰不出三國
志注影響割裂非贗非真猶沿明季之習固
不足爲侍御病耳孝廉所重輯者旣不可得

見余雖踵事增修不能自信姑先校刊姚本
以便巾箱隨時證佐至東晉秘書郎安定張
璠集二十八家易解十二卷則又湛深經術
不暇詳矣

道光癸卯三月甘泉黃奭右原

附姚之駟原序

漢記之稱因舊也意其時謝薛諸書皆未行
世璠因東京本朝之史而刪錄之且東觀記
續於熹平其後但有起居注諸書璠故畧于

國初而詳于季世亦以補其未備耳是以裴松之注魏蜀志多援是書爲證袁宏敘漢紀云經營八年疲而不能定始見張璠所撰書其言漢末之事差詳故復採而益之蓋是編罕傳當典午時已艱購若此吳正儀亦以爲逸書無考余秘書則厯敘羣史獨缺是編豈竟未識其名耶今所傳者千百之什一劉璋一論備具三長餘可知已

子史鈎沈

逸書考

張璠後漢紀

甘泉黃恩掄

明德馬后

明德馬皇后不喜出遊未嘗臨御窗牖

白帖十

靈帝

靈帝鑄天祿蝦蟆吐水於昌平門外橋東約入宮又作翻車渴烏施於橋西洒南北郊

御覽

九百四十九

少帝

帝以八月庚午爲諸黃門所刼步出穀門走

至河上諸黃門旣投河死時帝年十四

舊作十七歲

誤范書作十七歲陳留王九歲兄弟獨夜步行欲還

宮闇暝逐螢火而行數里得民家以露車載

送卒未公卿以下與卓共迎帝於北邙阪下

三國魏志董卓傳注

獻帝

靈帝以帝似己故名曰協

後漢書獻帝紀注

初平元年三月獻帝初入未央宮翟雉飛入

未央宮獲之

續漢書五行志二注

將入宮大雨盡晦翟雉飛入長安宮

後漢書獻帝紀

注

伏皇后

曹操入其二女於宮爲貴人誣伏氏爲亂使御史大夫郗慮仗節收后后被髮徒跣走而執上手曰不能復相活耶上大號驚哭曰我亦不知命在何時顧謂慮曰郗公天下暴虐豈有此乎左右莫不流涕遂殺后也

御覽一百三十一

張酺

張酺事太常桓榮講誦不怠每朝會輒講於御前以論難當意音動左右

書鈔九十八

盧芳

芳安定人屬國口數千畔在參蠻芳從之詐姓劉氏自稱西平王會匈奴匈奴林王將兵來降參蠻口芳因隨入匈奴留數年單于以中國未定欲輔立之追母樓且王求入五原與

假號將軍李興等結謀興北至單于庭迎芳

■外倚匈奴內因興等故能廣畧邊郡

姚之駟後

漢書

補逸案參蠻蠻字誤當作蠻

杜詩

杜詩爲南陽太守治作水排教化大行號曰

杜母

書鈔三十九御覽八百三十三引無末四字

梁冀

梁冀聚土築山十里九坂以象二嶠窮極工

巧積金玉明珠充牣其中

藝文七初學記五引至九坂

山多峭坂以象二嶠積金玉採捕禽獸以充
其中有人殺苑兔者迭相尋逐死者十三人
水經穀水注惠氏後漢書補注九引死者十
三人

梁冀起臺殿梁柱椽桷鏤爲青龍白虎畫以
丹青雲氣

御覽一百八十八張璠誤作張璠

梁冀多規苑囿西至弘農東至滎陽南入魯
陽北到河淇周旋十里

御覽一百九十六

梁冀起兔苑於河南移檄所在調發生兔刻
其毛以爲識民有犯者罪至死西域嘗有賈

胡來不知禁誤殺一兔轉相告坐死者十餘人也

御覽九百七藝文九十五引至以爲識

梁冀池中船無故自覆後被誅

御覽八百八十五

左雄

左雄爲尙書令限年四十先

舊作九誤試經然後

舉孝廉故雄爲令在位者各肅清時稱曰左

伯豪爲尙書天下皆慎選舉

書鈔五十九藝文四十八引至

舉孝廉初學記十一先字亦誤作九各肅清作各自肅引至此止御覽二百十引左雄爲尙書令卽接在位者各肅清至末尙書下有令字未有伯豪雄字也五字

范丹

范丹中平二年卒三府各遣令史奔弔累行

論謚僉曰宜爲貞節先生會葬二千餘人

藝文

四十御覽五百六十二引無中平二年四字
日上無僉字無末六字

宋穆之

宋穆之年二十爲郡督郵迎新太守到界上

太守見穆之問曰君年少爲督郵將因族世

自有令德穆之曰郡中瞻仰明公以爲非顏

淵不敢使迎孔子太守大奇其才問曰貞婦

孝子隱闇未彰言于府穆之曰方今聖化大
行文武未墜於地家有貞婦戶有孝子比屋
連棟不可勝紀太守嘆曰吾非仲尼督郵所
謂顏回者也

書鈔七十七姚之駟曰案此卽
朱穆事已見謝書但稍畧耳

朱穆

朱穆字公叔好學專精每一思至中食失餐
行墜坑坎亡失冠履其父常言穆大事幾不
知馬之幾足

御覽六百十四

梁冀第池中船無故自覆問椽朱穆曰舟所

以濟渡萬物不施遊戲也而今覆者天戒將

軍當濟渡萬民不可長念樂遊而已

藝文七十一御

覽七百六十九引也作而已而已作也樂遊作遊戲惠氏後漢書補注十一同

朱穆黨事禁錮

下有脫文

徵拜尙書正月百官朝

駕畢虎賁當陞置弓於地謂羣僚曰此天子

弓誰敢干越百僚皆迴避不敢當穆乃呵之

曰天子弓當載之於肩首之上乃敢置地大

不謹不敬卽收虎賁付詔獄治罪莫不肅然

服其忠烈

御覽二百十二

朱穆卒蔡邕與門人述其體行謚爲文忠先生夫謚者上之所贈非下之所造故顏閔至德不聞有謚朱蔡各以衰世臧否不立故私議之姚本案後漢書朱穆傳初穆父卒穆與蔡邕復與門人共述其體行謚爲文忠先生注引張璠論夫謚者云云不知姚本首十八字是割截范書以足成其義抑或別有所據又御覽五百六十二引蔡邕嘗至朱穆家寫其書及穆卒雍及門人共謚穆曰忠文下又引張璠論云云惠氏後漢書補注十一引同案朱穆父



■ 頡朱暉子

班超

班超使於外願將三十六人以爲蒿矢彈丸之用藝文六十御覽三百五十引於外作冥

馬防

馬防兄弟貴盛大起第觀連閣彌亘初學記十八

周舉

周舉上書言得失尙書郭度見之嘆息上疏願退位避舉常置其章於坐御覽五百九十四

郭伋

郭伋爲潁川太守光武詔曰賢能太守去帝

城不遠河潤九里冀京師并蒙其福御覽六十一郭

伋姚本作郭純蓋從書鈔一百五十八陳禹

謨補引之誤後有注云案諸書無郭純名此

條與華書郭伋同疑伋譌純也不知御覽正

作伋

樊睦御覽樊訛作楚案後漢書酷吏傳有樊睦為天水太守今據改正

樊睦為天水太守之官與故太守喪會於隴

亭堂吏移喪避睦睦讓於正堂關西稱之御覽

一百九十四惠氏後漢書補注十七引睦之官以下同

張溫

張溫以司空拜加車騎將軍征韓遂丙辰引

溫於崇德殿下溫以軍禮長揖不拜

書鈔六十四

楊秉

楊秉字叔卿爲太尉嘗曰我有三不惑酒色財也天下稱爲明公

御覽二百七書鈔五十一引無字叔卿三字

侯覽

山陽都督張儉奉中常侍侯覽起第十六區皆高樓四周連閣洞門之井蓮華壁柱綵畫魚池臺苑擬諸宮闕

藝文六十一

宋登

樂登字叔陽出爲潁川太守市爲豫價賂不
拾遺病免卒於家汝陰人配社祀之藝文五
十御覽
二百六十爲作無

陳球

陳球爲零陵太守球到郡設方畧朞月間賊
虜消散而州兵朱益等反與桂陽賊胡蘭數
萬人轉攻零陵零陵下濕編木爲城不可守
備郡中惶恐掾史白請遣家避難球怒曰太
守分國虎符受任一郡豈顧妻孥而沮國威

乎重復言者斬乃悉郡內吏民老弱與其守

城

御覽二百六十此作朱益下又作朱蓋未知孰是

陳球爲零陵太守州兵朱蓋等反與桂陽賊

胡簡數萬人轉攻零陵球城守弦大木爲弓

羽矛爲矢引機發之遠射千餘步斬朱蓋等

御覽三百四十七前作胡蘭此作胡簡未知孰是藝文六十引陳球爲零陵太守州兵朱蓋等反球守城以下同千餘步作千餘人

周景

景父榮章和世爲尙書令初景厯位牧守好

善愛士每歲舉孝廉延請入上後堂與家人
宴會如此者數四及贈送既備又選用其子
弟常稱曰移臣作子於之何有先是司徒韓
縝爲河內太守在公無私所舉一辭而已後
亦不及其門戶曰我舉若可矣不令恩偏稱
一家也當時論者或兩譏焉

三國吳志周瑜傳注景瑜從祀

父

成瑨

南陽太守弘農成瑨任任功曹岑晊時人爲

之語曰南陽太守岑公孝弘農成瑨但坐嘯
文選謝玄暉在郡臥病呈沈尚書詩注

李固

桓帝竇皇后崩中常侍曹節王甫欲以貴人
禮葬太尉李固自扶輿起擣椒自隨謂妻子
曰若太后不得配桓帝吾不生還矣藝文八
十九御覽九百五十八

吳祐

吳祐父恢爲海南太守欲以殺青寫書祐年

十二諫曰海濱多珍玩此書若成載必盈輶
昔馬援以薏苡興謗王陽以書橐邀名疑惑
之間先賢所慎恢大喜御覽六百六案姚本云吳祐父恢爲南海太守欲殺青簡以寫經書祐年十二諫曰海濱舊多珍怪上爲國家所疑下爲權戚所望此書若成則載之兼兩昔馬援以薏苡興謗王陽以衣囊邀名嫌疑之間誠先賢所慎也恢乃止撫其手曰吳氏世不乏季子矣所載與此異

陳寵

陳寵爲廣漢太守風聲大行徵爲大司農帝問何以爲治寵曰臣任功曹王渙渙由是知

名御覽二百六十四又二百三十二引至大司農

王堂

王堂爲汝南太守教掾吏曰其憲章朝右委功曹陳蕃文選盧子諒贈劉琨詩注

范滂

范滂字孟博汝南伊陽人爲公曹辟公府掾升車攬轡有澄清天下之志百城聞滂高名皆解印綬去爲黨事見誅世說賞譽篇注惠氏後漢書補注十六引滂汝南伊陽人案汝南無伊陽或細陽之誤也

种暘

永昌太守鑄黃金之蛇獻之梁冀益州刺史
种暘發其事

御覽八百十

荀顗

荀顗上書順帝曰自入正月久陰不雨雲者
雨之具也

姚本

時人語

時人爲之語曰不畏彊禦陳仲舉天下楷模

李元禮

世說品藻篇注

孔融

孔融字文舉拜太中大夫性寬容少忌好士
喜誘掖後進及退閒職賓客日滿其門愛才
樂酒嘗嘆曰坐上客常滿樽中酒不空吾無
憂矣書鈔五十六藝文二十八引孔融拜太中大夫雖家居失勢賓客日滿其門愛才樂士常若不足每嘆曰坐上賓常滿樽中酒不空吾無憂矣御覽四百五引同藝文賓常滿作客常滿

融在郡八年僅以身免帝初都許融以爲宜
畧依舊制定王畿正司隸所部爲千里之封

乃引公卿上書言其義是時天下草創曹袁之權未分融所建明不識時務又天性氣爽頗推平生之意狎侮太祖太祖制酒禁而融書喟之曰天有酒旗之星地列酒泉之郡人有旨酒之德故堯不飲千鍾無以成其聖且桀紂以色亡國今令不禁婚姻也太祖外雖寬容而內不能平御史大夫郗慮知旨以法免融官歲餘拜太中大夫雖家居失勢而賓客日滿其門愛才樂酒常嘆曰坐上客常滿

樽中酒不空吾無憂矣虎賁士有貌似蔡邕者融每酒酣輒引與同坐曰雖無老成人尙有典刑其好士如此

三國魏志崔琰傳注

王龔

龔字伯宗有高名於天下順帝時爲太尉初山陽太守薛勤喪妻不哭將殯臨之曰幸不爲天復何恨哉及龔妻卒龔與諸子並杖行

服時人或兩譏焉

三國魏志王粲傳注龔粲會祖文選曹子建王仲宣

誄注引至爲太尉白帖十七引山陽太守薛勤至復何恨又引王龔妻亡至時人兩譏之

鄭氏後漢書補注十三引初山陽至末

王暢

暢字叔茂名在八俊靈帝時爲司空以水災
免而李膺亦免歸故郡二人以直道不容當
時天下以暢膺爲高士諸危言危行之徒皆
推宗之願涉其流惟恐不及會連有災異而
言事者皆言三公非其人宜因其變以暢膺
代之則禎祥必至由是宦豎深怨之及膺誅
死而暢遂廢終於家

同上暢王粲祖文選曹
子建王仲宣誄注引至

爲司空惠氏後漢書補注十三引暢名在八
俊以水災免下同

鄭泰

泰字公業少有才畧多謀計知天下將亂陰
交結豪傑家富於財有田四百頃而食常不
足名聞山東又見御覽八百二十一舉孝廉
三府辟公車徵皆不就何進輔政徵用名士
以泰爲尙書侍郎加奉車都尉進將誅黃門
欲召董卓爲助泰謂進曰董卓強忍實義志
欲無饜若借之朝政授之大事將肆其心以

危朝廷以明公之威德據阿衡之重任秉意
獨斷誅除有罪誠不待卓以爲資援也且事
留變生其鑒不遠又爲陳時之要務進不能
用乃棄官去謂潁川人荀攸曰何公未易輔
也進尋見害卓果專權廢帝關東義兵起卓
會議大發兵羣僚咸憚卓莫敢忤旨泰恐其
強益將難制乃曰夫治在德不在兵也卓不
悅曰如此兵無益邪衆人莫不變容爲泰震
慄泰乃詭辭而對曰非以無益以山東不足

加兵也今山東議欲起兵州郡相連人衆相動非不能也然中國自光武以來無雞鳴犬吠之驚百姓忘戰日久仲尼有言不教民戰是謂棄之雖衆不能爲害一也明公出自西州少爲國將閑習軍事數踐戰場名稱當世以此威民民懷懾服二也袁本初公卿子弟生長京師體長婦人張孟卓東平長者坐不窺堂孔公緒能清淡高論噓枯吹生無軍師之才負霜露之勤臨鋒履刃決敵雌雄皆非

明公敵三也察山東之士力能跨馬控弦勇
等孟賁捷齊慶忌信有聊城之守策有良平
之謀可任以偏師賁以成功未聞有其人者
四也就有其人王爵不相加婦姑位不定各
恃衆怙力將人人綦峙以觀成敗不肯同心
共膽率徒旅進五也關西諸郡北接上黨太
原馮翊扶風安定自頃以來數與胡戰婦女
載戟挾矛弦弓負矢況其悍夫以此當山東
志戰之民譬驅羣羊向虎狼其勝可必六也

且天下之權勇今見在者不過并涼匈奴屠
各湟中義從八種西羌皆百姓素所畏服而
明公權以爲爪牙壯夫震悚況小醜乎七也
又明公之將帥皆中表腹心周旋日久自三
原狹口以來恩信醇著忠識可遠任智謀可
特使以此當山東解合之虛誕實不相若八
也夫戰有三亡以亂攻治者亡以邪攻正者
亡以逆攻順者亡今明公秉國政平討夷凶
宦忠義克立以三德待於三亡奉辭伐罪誰

人敢禦九也東州有鄭康成學該古今儒生
之所以集北海邴根矩清高直亮羣士之楷
式彼諸將若詢其計畫案典校之強弱燕趙
齊梁非不盛終見滅於秦吳楚七國非不衆
而不敢踰滎陽況今德政之赫赫股肱之邦
良欲造亂以徼不義者必不相然讚成其凶
謀十也若十事少有可采無事徵兵以驚天
下使患役之民相聚爲非棄德恃衆以輕威
重卓乃悅以泰爲將軍統諸軍擊關東或謂

車曰鄭泰智畧過人而結謀山東今資之士
歸使就其黨竊爲明公懼之卓收其兵馬留
其護郎後又與王允謀共誅卓泰脫身自武
關走東歸後將軍袁術以爲揚州刺史未至
官道卒時年四十一

三國魏志鄭渾傳注泰
鄭渾兄

蔡邕

蔡邕字伯喈陳留圉人六世祖勲與鮑宣卓
茂不仕新室父穰亦有清白行諡貞定

姚本

蔡邕上靈帝書云復見幽州突騎冀州强弩

爲天下精兵國家膽核書鈔一百一十七御覽
帝曰幽州突騎冀州強弩天下精兵也

靈帝時虹晝見庭中引議郎蔡邕詣金商門

問對曰虹蜺小人女子之祥也初學記一御覽十四引靈

帝光和元年虹晝見御座殿庭前色青赤上引蔡邕問之對曰虹霓小人女子之祥案鮑本小下脫人字

初蔡邕以言事見從名聞天下義動志士及
還內寵惡之邕恐乃亡命海濱往來依太山
羊氏積十年卓爲太尉辟爲掾以高第爲侍

御史治書三日中遂至尙書後遷巴東太守
卓上留拜侍中至長安爲左中郎將卓重其
才厚遇之每有朝廷事常令邕具草及允將
殺邕時名士多爲之言允悔欲止而邕已死
三國魏志董卓傳注

王允

布兵敗駐馬青瑣門外謂允曰公可以去允
曰安國家吾之上願也若不獲則奉身以死
朝廷幼主恃我而已臨難苟免吾不爲也

力謝關東諸公以國家爲念催汜入長安城屯南宮掖門殺太僕魯馮大鴻臚周奐城門校尉崔烈越騎校尉王頌吏民死者不可勝數司徒王允挾天子上宣平城門避兵催等於城門下拜伏地叩頭帝謂催等曰卿無作威福而乃放兵縱橫欲何爲乎催等曰董卓忠於陛下而無故爲呂布所殺臣等爲卓報讎弗敢爲逆也請事竟詣廷尉受罪允窮逼出見催催誅允及妻子宗族十餘人長安城

中男女大小莫不流涕允字子師太原祁人也少有大節郭泰見而奇之曰王生一日千里王佐之才也泰雖先達遂與定交三公並辟厯豫州刺史辟荀爽孔融爲從事遷河南尹尙書令及爲司徒其所以扶持王室甚得大臣之節自天子以下皆倚賴焉卓亦推信之委以朝廷

三國魏志董卓傳注

荀淑

淑有八子儉鯁靖燾汪

汪字疑誤據三國魏志荀彧傳注作洸

爽肅敷淑居西豪里縣令苑康曰昔高陽氏

有才子八人遂署其里為高陽里時人號曰

八龍世說德行篇注御覽一百五十七引荀爽兄弟八人時人謂之八龍舊居西豪

里縣令苑康曰昔高陽氏有才子八人署其

里曰高陽里又四百七十四七百七十四引

同一百五十七三國魏志荀彧傳注引淑舊

居西豪里至為高陽里署上無遂字

淑博學有高行與李固李膺同志友善拔李

昭於小吏友黃叔度於幼童以賢良方正徵

對策譏切梁氏出補朗陵侯相卒官八子儉

緄靖肅說爽肅勇三國魏志荀彧傳注淑彧

祖父

荀爽

爽字慈明幼好學年十二通春秋論語耽思
經典不應徵命積數十年董卓秉政復徵爽
爽欲遁去吏持之急詔下郡卽拜平原相行
至苑陵又追拜光祿勳視事三日策拜司空
爽起自布衣九十五日而至三公三國魏志
荀彧傳注
世說言語篇注引董卓秉政至吏持之急下
卽接起布衣九十五日而至三公
荀爽爲三公食不過一肉脫粟飯坐皮褥書
鈔

三十四藝文七十御覽四百三十一

荀靖

靖字叔慈亦有至德名幾亞爽隱居終身三國志荀彧傳注

荀悅

悅清虛沈靜善於著述建安初爲祕書監侍中被詔刪漢書作漢紀三十篇因事以明臧否致有典要其書大行於世同上

荀昱 荀曇 荀彛

昱曇並傑俊有殊才昱與李膺王暢杜密等

號爲八俊位至沛相攸父彝州從事彝於或
爲從祖兄弟三國魏志荀攸傳注曇荀攸祖
父案荀氏家傳曇字元智兄昱
字伯修

何顒

顒字伯求少與郭泰賈彪等遊學洛陽泰等
與同風好顒顒名太學於是中朝名臣太傅
陳蕃司隸李膺等皆深接之及黨事起顒亦
名在其中乃變名匿汝南間所至皆交結其
豪傑顒旣奇太祖而知荀彧袁紹慕之與爲

奔走之友是時天下士大夫多遇黨難願常
歲再三私入洛陽從紹計議爲諸窮窘之士
解釋患禍而袁術亦豪俠與紹爭名願未嘗
造術術深恨之

三國魏志荀攸傳注

董卓

董卓鑄小錢悉取洛陽及長安中銅人鐘簠
飛廉銅馬之屬以充鑄又太史靈臺及永安
侯銅門楯亦取之

姚本案太史靈臺至取之
見後漢書董卓傳注門作

闕亦上有卓字鑄小錢至以充鑄見范書董卓傳

董卓呼三台尙書以下自詣卓啟事然後得
行御覽五百九十五

董卓於衆坐中生斬人手足又鑿目截舌口
百姓嗷嗷道路以目御覽三百六十七又三
百七十無又鑿目截舌
口道路以目十字

朱雋

朱雋少孤母以販繒綵爲事同郡周起負官
債百萬縣催責之雋竊母帛爲起償債御覽
十四

朱雋爲郡吏太守尹端有罪應死雋爲買珍
寶賂主章吏端得免死

御覽八百二

皇甫嵩

卓抵其手謂皇甫嵩曰義眞怖未乎嵩對曰
明公以德輔朝廷大慶方至何怖之有若淫
刑以逞將天下皆懼豈獨嵩乎卓默然遂與
嵩和解

三國魏志董卓傳注

种劭

太常种拂與李儒戰而死子劭徵爲少府鴻

臚皆不受曰我父盡忠於朝而爲時所妬父
以身殉國爲賊臣所害爲臣子不能除賊何
面目復覲明主三輔聞之爲之感動御覽二百三十一
六惠氏後漢書補注十三引我父盡忠至末
身殉下無國字爲臣子上有吾字

橋玄

玄歷位中外以剛斷稱謙儉下士不以王爵
私親光和中爲太尉以久病策罷拜太中人
夫卒家貧乏產業柩無所殯當世以此稱爲
名臣三國魏志武帝紀注姚本歷位中外上
作橋玄字公祖書鈔五十六引橋玄拜

太中大夫謙儉下士子弟宗親無在大官者
卒家無餘業喪無所殯當時稱之

賈琮

賈琮爲荊州刺史郡縣聞之莫不震慄

書鈔三十

六

賈琮爲荊州刺史將入界高褰車檐曰刺史
當遠視廣聽何爲而垂帷乎

姚本

王立

初天子敗於曹陽欲浮河東下侍中太史令
王立曰自去春太白犯鎮星於斗牛過天津

熒惑又逆行守北河不可犯也由是天子遂
不北渡河將自軹關東出立又謂宗正劉艾
曰前太白守天關與熒惑會金火交會革命
之象也漢祚終矣晉魏必有興者立後數言
於帝曰天命有去就五行不常盛代火者土
也承漢者魏也能安天下者曹姓也唯委任
曹氏而已公聞之使人語立曰知公忠於朝
廷然天道深遠幸勿多言

魏志武帝紀注開元占經二十一御覽二百三十五引天子作王侍中作御史由

是天子遂不北渡河作由是遂北渡河脫不

宇謨立後作後立公聞之上有曹字天道上
無然字書鈔五十五引太史令王立言漢祚
將終代漢者魏曹公聞之使人語曰天道深
遠幸勿多言

袁紹

董卓謂袁紹曰劉氏種不足復遣紹勃然曰
天下健者豈惟董卓公橫刀長揖徑出懸節於
上東門而奔冀州 御覽六百八十一

曹操

殺紹卒凡八萬人 三國魏志袁紹傳注

劉表

表與同郡人張隱薛郁王訪宣靖公褚恭劉
祇田林爲八交或謂之八顧三國魏志劉表傳注惠氏後漢書補注十六引劉表與同郡人張隱等爲八交或謂之八顧也

孫堅

堅初平二年死 三國吳志孫策傳注

劉璋

劉璋愚弱而守善言斯亦宋襄公徐偃王之
徒末爲無道之主也張松法正雖君臣之義
不正然固以委名附質進不顯陳事勢若韓

嵩劉光之說劉表退不告絕奔亡若陳平韓
信之去項羽而兩端攜貳爲謀不忘罪之次
也

三國蜀志劉璋傳注引張璠曰

譙周

譙周所陳降魏之策蓋素料劉禪懦弱心無
害戾故得行也如遇忿肆之人雖無他算然
矜殉鄙恥或發怒妄誅以立一時之威快其
斯須之意者此亦夷滅之禍云

三國蜀志第
十二傳後評

于闐大都末

莎車王殺于闐王于闐大都末出城見野豕
欲搏之乃人語曰無殺我我爲汝殺莎車將
軍都末異之卽與兄弟共殺莎車王藝文九
覽九百三引大下有人字搏作射乃語人作
豕乃語兄弟誤作先

北郊

北郊在雒陽城北六里後漢書祭祀志中引
張璠記璠字誤當作璠

條支國

條丈國臨西海出師子孔雀御覽九百二十四

子史鈎沈

逸書考

虞預晉書

甘泉黃奭學

高祖宣帝

上雖服膺文藝以儒素立德而雅有雄霸之
量值魏氏短祚內外多難謀而鮮過舉必獨
克知人拔善顯揚側陋王基鄧艾周泰賈越
之徒皆起自寒門而著績於朝經畧之才可
謂遠矣

御覽九十五

扶風王駿

虞預晉書

駿字子臧宣帝第十七子好學至孝

世說德行篇注

趙王倫

趙王倫篡位侍中常侍九十七人每朝小人

滿庭貂蟬半坐時人謠曰貂不足狗尾續

任彥升爲范尚書讓吏部封侯第一表注引虞預晉錄

齊王冏

冏字景治齊王攸子也少聰惠及長謙約好

施趙王倫篡位冏起義兵誅倫拜大司馬加

九錫政皆決之而恣用羣小不復朝覲遂爲

長沙王所誅

世說方正篇注

西陽王羨

西陽王羨上書曰朱旗南指自相夷戮

文選邱希

範與陳伯之書注

王祥

祥以後母故陵遲不仕年向六十刺史呂虔檄爲別駕時人歌之曰海沂之康實賴王祥邦國不空別駕之功

世說德行篇注

荀勗

勗字公曾潁川潁陰人漢司空爽曾孫也十
餘歲能屬文外祖鍾繇曰此兒當及其曾祖
爲安陽令民生爲立祠累遷侍中書監

世說
方正
篇注

和嶠

嶠厚自封殖嶷然不羣

世說品藻篇注

裴秀

秀字季彥河東聞喜人父潛魏太常秀有風
操八歲能著文叔父徽有聲名秀年十餘歲

有賓客詣徽出則過秀時人爲之語曰後進
領袖有裴秀大將軍辟爲掾父終推財與兄
年二十五遷黃門侍郎晉受禪封鉅鹿公後
累遷左光祿司空四十八薨諡元公配食宗
廟世說賞譽篇注

張華

武帝論平吳功唯羊祜王濬張華三人各絹
萬疋其餘莫得此比

御覽八百十七

王渾

渾字玄沖太原晉陽人魏司徒昶子仕至司徒
世說賢媛篇注

王戎

戎由是顯名
世說德行篇渾瑗所歷九郡義故懷其德惠相率致贖數百萬戎悉不受注

王衍

王衍字夷甫琅邪臨沂人司徒戎從弟父又平北將軍夷甫蚤知名以清虛通理瑤仕至太尉爲石勒所害
世說言語篇注

王浚

王渾從子浚字彭祖司空王沉賤嬖也少時
不爲親黨所知渾謂弟深等曰卿等莫輕彭
祖此兒平世不減方州牧伯亂世可爲都督
三公懷愍之世果爲幽冀都督位至鼎輔如
渾所說 御覽五百十三

山濤

山濤字巨源河內懷人祖本郡孝廉父曜客
句令濤早孤而貧少有器量宿士猶不漫士

年十七宗人謂宣帝曰濤當與景文共綱紀天下者也帝戲曰卿小族那得此快人邪好老莊與嵇康善爲河內從事與石鑒共傳宿夜起蹋鑒曰今何等時而眠也知太傅臥何意鑒曰宰相三日不朝與尺一令歸第君何慮焉濤曰咄石生無事馬蹄間也投傳而去果有曹爽事遂隱身不交世務累遷吏部尙書僕射太子太傅司徒年七十九薨諡康侯世說政事篇注

山簡

簡字季倫平雅有父風與嵇紹劉渙等齊名
遷尙書出爲征南將軍

世說賞譽篇注

山嶽

山嶽守潁川

文選嵇叔夜與山巨源絕交書
注 嶽山公族父

嵇康

銓有嵇山家於其側因氏焉

世說德行注

嵇紹

元康元年河間成都二王舉兵向京都朝廷

北討徵嵇紹爲侍中王族不振敗績於湯陰
百官侍衛莫不潰散唯紹以身捍寇兵突御
輦飛矢雨集紹遂被害於帝側血濺御服及
定左右欲浣衣帝曰此嵇侍中血勿去御覽
七百五

盧欽

盧欽字子若少好學爲尙書僕射領吏部欽
清實選舉稱爲廉平初學記十一
百十四
文選任彥升
王文憲集序注引無字子若三字

魏舒

魏舒少名遲鈍唯太原王父曰卿終當爲台
輔然亦不能令妻子免飢寒吾當助卿營之
嘗借給舒受而不辭

御覽四百四十二

樂廣

樂廣字彥輔南陽人清夷冲曠加有理識累
遷侍中河南尹在朝廷用心虛淡時人重其
貞貴代王戎爲尙書令

世說言語篇注

戴淵

機薦淵於趙王倫曰蓋聞繁弱登御然後高
墉之功顯孤竹在肆然後降神之曲成伏見
處士戴淵砥節立行有井渫之潔安窮樂志
無風塵之慕若得寄迹康衢必能結軌驥駉
耀質廊廟必能垂光瑜璠夫枯岸之民果於
輸珠潤山之客烈於貢玉蓋明暗呈形則庸
識所甄也倫卽辟淵

世說自新篇注

周處

處入晉爲御史中丞多所彈糾不避彊禦齊

萬年反以處爲建威將軍西征衆寡不敵臨陣慷慨奮不顧命遂死於戰場追贈平西將軍處子玘札皆有才力中興之初並見寵任其諸子姪悉處列位爲揚土豪右而札凶淫放恣爲百姓所苦泰寧中王敦誅之滅其族

吳志周魴傳注

司馬彪

司馬彪少篤學不倦好色薄行不交人事專精學問太始中爲秘書郎後轉爲丞

御覽二百三十

武陔 武韶 武茂

周字伯南沛國竹邑人位至光祿大夫子陔
字元夏陔及二弟韶茂皆總角見稱並有器
望雖鄉人諸父未能覺其多少時同郡劉公
榮名知人嘗造周周謂曰卿有知人之明欲
使三兒見卿卿爲目高下以效郭許之聽可
乎公榮乃自詣陔兄弟與其言語觀其舉動
出語周曰君三子皆國士也元夏器量最優

有輔佐之風展力仕宦可爲亞公叔夏季真
不減常伯納言也陔少出仕宦歷職內外泰
始初爲吏部尙書遷左僕射右光祿大夫開
府儀同三司卒於官陔以在魏已爲大臣本
非佐命之數懷遜讓不得已而居位故在官
職無所荷任夙夜思恭而已終始全潔當世
以爲美談韶歷二官吏部郎山濤啟事稱韶
清白有誠終於散騎常侍茂至侍中尙書潁
川荀愷宣帝外孫世祖姑子自負貴戚要與

茂交茂拒而不答由是見怨元康元年楊駿

被誅愷時尙書僕射以茂駿之姨弟陷爲駿

黨遂枉見殺衆咸冤痛之

魏志胡質傳注引世說賞鑒篇注引

武陟字元夏沛國竹邑人父周魏光祿大夫

陟及二弟韶茂皆總角見稱並有器望鄉人

諸父未能覺其多少時同郡劉公榮名知人

嘗造周周見其三子公榮曰君三子皆國士

元夏器量最優有輔佐之風力仕可爲亞

叔夏夏季夏不減常伯納言也陟至佐僕射

御覽四百四十二引武陟字元夏沛國竹邑

人父周有顯名陟及二弟韶茂皆總角見稱

時同郡劉公榮名知人嘗詣周過陟兄弟與

觀其舉動便出語周曰君三子皆國士也元

夏器量最優有輔佐之風仕宦可爲亞公叔

夏季夏不減常伯納言陟後果開府案父周

三周字俱訛作周

祖述

遜字仕穉范陽道人豁蕩不修儀檢輕財好

施卅說賞譽篇注

溫嶠

嶠字太真太原祁人少標俊清徹英穎顯名
爲司空劉琨左司馬是時二都傾覆天下大
亂琨聞元皇受命中興忼慨幽朔志存本朝
使嶠奉使嶠喟然對曰嶠雖乏管張之才而

明公有桓文之志敢辭不敏以違高旨以左
長史奉使勸進累遷驃騎大將軍世說言語
篇注
元帝卽位以溫嶠爲散騎侍郎嶠以母亡逼
賊不得往臨葬固辭詔曰嶠以未葬朝儀又
頗有異同故不拜其令入坐議吾將折其衷
世說尤悔篇注

王導

王導上言曰迴青蓋以反上京文選陸佐公
石闕銘注

周顗

周顥字伯仁汝南安城人揚州刺史浚長子也

世說言語篇注

華軼

華軼字彥夏平原人魏太尉歆曾孫也累遷江州刺史傾心下士甚得士歡心以不從元皇命見誅

世說識鑒篇注

刁協

刁協字玄亮勃海饒安人少好學雖不精研而多所博涉中興制度皆稟於協累遷尚書

令中宗信重之爲王敦所忌舉兵討之至江南敗死

世說方正篇注

戴儼

戴儼字若思廣陵人才義辯濟有風標鋒穎累遷征西將軍爲王敦所害贈左光祿大夫儀同三司

世說賞譽篇注

劉隗

劉隗字大連彭城人學涉有具爲秘書郎避亂南渡遂爲中宗從事中郎甚見器遇

御覽二百

卷十九

劉隗爲丞相司直在朝多所彈糾雖上不盡從多見採用也

書鈔六十二又引劉隗爲司直多所糾劾

賀循

循丁家禍流放海濱吳平還鄉里節操高厲童齒不羣言行舉動必以禮讓好學博聞尤善三禮舉秀才除陽羨武康令陸機陸雲表薦循曰伏見吳興武康令賀循德量邃茂才鑒清遠服膺道素風操凝峻厯踐三城刑政

肅穆守職下縣編名凡萃出自新邦朝無知
已恪居遐外志不自營年時倏忽而邈無階
緒實州黨愚智所爲悵然臣等並以凡才累
授飾進被服恩澤忝豫朝末知良士後時而
守局無言懼有蔽賢之咎是以不勝愚管謹
冒死表聞久之召爲太子舍人石沐破揚循
亦合衆事平杜門不出陳敏作亂以循爲丹
陽內史循稱疾固辭敏不敢逼於是江東豪
右無不受敏爵位惟循與同郡朱誕不挂賊

後除吳國內史不就元皇帝爲鎮東將軍
請循爲軍司馬帝爲晉王以循爲中書令固
讓不受轉太常領太子太傅時朝廷初建動
有疑議宗廟制度皆循所定朝野諮詢爲一
時儒宗年六十太興二年卒追贈司空諡曰
穆循諸所著論並傳於世子隰臨海太守吳志
賀邵傳注書鈔六十五引賀循爲太子太傅朝廷初建至朝野諮詢

呂漪

敦克京邑參軍呂漪說敦曰周顗戴淵皆有

名望足以惑衆視近日之言無慚懼之色若不除之役將未歇也敦卽然之遂害淵顗初漪爲臺郎淵旣上官素有高氣以漪小器待之故售其說焉

世說尤悔篇注

庾琮

琮字子躬潁川人太常峻第二子仕至太尉掾

世說賞譽篇注

何楨

何楨字元幹廬江人也爲尙書郎特詔參秘

書丞秘書本有一丞時尙未轉遂以楨爲右

丞右丞之置自楨始也

御覽二百三十三楨訛爲楨從書鈔初學

記改書鈔五十七引無廬江人也四字遂以楨爲右丞右丞譌作左

何楨字元幹爲弘農郡守有楊囂生爲郡吏

楨一見便待以不臣之禮遂貢之天朝

初學記二

書鈔三十三引貢之天朝

賀齊

賀氏本姓慶氏齊伯父純儒學有重名漢安
帝時爲侍中江夏太守去官與江夏黃瓊漢

中楊厚俱公車徵避安帝父孝德皇帝諱改
為賀氏齊父輔永寧長

吳志賀齊傳注

淳于伯

丞相府斬督運令史淳于伯血流著柱終
杙末三丈三尺旋復流下四尺五寸百姓咸
稱其冤

御覽三百七十五

王豹

東平主簿王豹白事齊王曰況豹雖陋故大
州之綱紀也

文選傳季友為宋公修張良廟
敘注

寫起居注

秘府有布紙三萬餘枚不任寫御書乞四百枚付著作吏寫起居注

事類賦十五引虞預表

子史鉤沈

逸書考

朱鳳晉書

甘泉黃奭學

文帝

文帝諱昭字子上宣帝次子也

世說言語篇注

元帝

帝諱戡字景文祖伯封琅邪王父恭王瑾嗣
帝襲爵爲琅邪王少而明惠因亂過江起義
遂卽帝王位

世說言語篇注

齊王攸

民國甲戌

朱鳳晉書

江都朱氏

咸寧中詔賜齊王攸之朝車設旗

補刊
書鈔一百
三十九

梁王彤 趙王倫

宣帝張夫人生梁孝王彤字子微位至太宰

桓夫人生趙王倫字子彝位至相國世說德
行篇注

宣帝桓夫人生趙王倫位至相國倫請三萬

人往平齊萬年朝議不許文選潘安仁關中
詩注

彭城王權

彭城穆王權字子輿宣帝弟廋子太始元年

封世說汰侈篇注

司馬孚

文帝立度支尙書軍糧計校一由之以司馬
孚爲之

御覽二百十七

陳與審

左軍陳與審之子以父老求去職宿衛不宜
曠詔以爲通直常侍

御覽二百二十四

劉琨

前後徙河北諸郡縣居山間謂之羯胡劉琨

勸進表曰狡寇窺窬伺國瑕隙

文選沈休文齊故安陸昭

民國甲戌

未鳳晉書

二江都朱氏

王碑注

卷之四

補刊